



CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
JUN 26 1940

3

T 5427/1122





緱山先生集卷之一

哈佛大學漢和
圖書館珍藏印

太倉王衡辰玉甫著

男時敏校

詩

西湖四賢祠迎神歌

有沁兮井涯亭宛宛兮繚之汲井兮宿酒鱸鯉
今且有素衣裳兮澹如煙恍寒帷兮與言我客
兮我俎紛拜起兮王母輓鱸忽兮若驚魚奮揚
兮將雨

右李鄴侯

靈之來兮日未卯靈之容兮尚妍以少山花兮
楚楚儼擘帶兮睇予春渠宛兮至今溝洫泚泚
兮田疇淺深池上兮孔閑紛歌舞兮如林賓餞
兮穆穆俏月出兮波綠 右白侍郎

堤深兮水暄畜魚鱉兮長子孫柳花兮木李繁
不蠹兮又美薦之兮中流拍簫鼓兮淺洲畫船
兮寶馬歡與我兮游者春之日秋之夜湖中之
人兮告以暇 右蘇學士

山孤兮樹寒霜雪下兮攢攢鶴之巢兮生鶴鶴
于歸兮翼薄草青兮墓田瞻徘徊兮焉托雷峯
兮舉火將進酒兮容與靈去兮若旋標梅兮翻
翻 右林處士

山中雜詠

日暮走旱麓雨過山氣青谷中發空響鑿石何
丁丁累累負之去去作誰家楹我憐石骨破松
根橫來爭根老子復出此石何時平

微雨洗石竇春流靜無言旁有青草肥戎戎覆
高原掬之不可得照見衣裳翻撥杖尋泉源透

縉山先生集 卷之一
二
迤出山裏山前有清水遊者過歡喜變易生乎
動人情好遷徙彼哉涇與渭宗祖竟誰是

向來紅杏樹著葉青蕪蕪百鳥競深巢啼者爲
鷓鴣一啼葉欲長再啼葉欲枯游子樂未央白
日柰已徂

門前無名樹團團蓋行路根老頗有瘦節多不
生蠹坐者仰而嗅行者歎而去嗚呼栢與楸妄
爲立名字濕重黃膏封亦復誰省記得蔭且卽
休無爲問同異

蘚花漬屋瓦山空鬼風哀朱衣而火冠燐火爲
之來魂魄本好靜其以尋酒杯怒而欲訴誰無
乃生人猜去去同所歸春日聊裴徊

青青牆頭花野草半相附好女簪山萱視之去
不顧余心雅自憐潔修委行路豈不見游丁被
服紈與素所患指日多君子處其汗

古廟有高樹樹上新鴉青新鴉飛不高繞我田
車行阿母呼其雛慎勿輕作聲人心不可測鷄
子來縱橫空巢落山果飲啄將無傾

終山先生集 卷之一
我來菜花收薄言擷其子蠶繭飛爲蛾山翁罷
酒市當戶理桔槔開畦待新水努力貴及時布
穀聲爾爾歸以語吾友農夫且如此

山中有好夢雨花來自天老僧髮根青告我以
九禪指畫富言語記憶無倒顛覺而識其處惟
有箇在焉明星白堂堂影落松樹間巫咸不足
問斯理亶其然

遊西湖歸及暮

錢塘九月潮怒平日出杲杲湖光明舟人攤篙
不防淺畫船紅旗射魚眼湖烟染樹輕于風綠
盡高山及平行齋鐘一敲簫鼓清前船恰上湖
心亭白墻紅樹酒家裏來者將醉去者醒醉看
芙蓉高復低賭詩鬪韻歌聲齊迤邐六橋花更
暖提壺再上蘇公堤堤上行人如走馬共息蘇
公桃樹下烹魚膾蟹坐如雲日暮曾無弔君者
看看水面天模糊神燈磊落行渡河西陵西陵
柰爾何

過故宋離宮

終山先生集 卷之一 四
泉聲嗚咽寺門前望到斜陽更黯然佛閣幾經
粧閣改柳枝翻作竹枝傳蠨蛸露下游銅井躑
躅春紅滿藉田聞道武林春社裏至今土鼓挂
榆錢

竹子深深覆短溝人傳此地鳳凰遊江水不能
遮馬腹宮墻隨意長禾頭平原燒白無歸鳥野
戍霜青好放牛寒食清明更蕭瑟汴州今亦似
杭州

鳳凰山上日紅時正好芙蓉夾岸吹肅肅大堤
來觀馬叢叢少女進深卮十三處所無行館四
百季來讀斷碑始信滄桑亦常事及時行樂不
須疑

西湖上拜岳武穆墓

當年飛將事橫行強弩如風射不平戰後歡呼
重出塞軍前痛哭話休兵此身恩遇先酬死中
土功勞負請纓怒逐鴟夷入江水新潮更接舊
潮生

酌水包茅薄獻酬不須入墓氣如秋寧辭腔血

經山先生集 卷之一 五
膏原野誰使勲名在淺丘伏臘衣冠新戟下有
時風雨大刀頭西湖縱道經行處夜夜神燈照
汴州

游西湖諸山詩

余與仲醇以九月遊武林高至五雲幽至
水樂無不探者每夜飲酒至醉則與仲醇
互唱韻作詩舒匹紙寫擘窠大字唱絕而
句不成者罰又遣一童子舉酒杯酒冷而
篇不就者罰法無短長興盡而止興無多
寡紙盡而止故詩皆草草不足當里謠也

登五雲山

西湖之陰山簇簇登高望遠五雲獨江濤拍雲
千尺強繚繞來及山之足山危無杖攀烏巢風
吹大樹如短蒿松頭多烟亦多雨半嶺霏黑空
生毛須臾日出若乍曉會稽山陰殊可了市梢
青入平沙長歇涼亭外行人小行人花帽衣蓬
蓬擔羊買酒携兒童上堂再拜復再舞願山無
虎田無蟲祝者盡道神來止竹上挑燈紅累累

我亦攝衣前致辭願我遊山日歡喜

僧刁雲年少知詩挾之遊湖盤桓數日而歸

生憎不識西湖月與君到處尋船歇煙橫橋斷
行人歸魚梁蟹麓參差沒沸酒闌韻期君詩君
詩能及酒熱時短巾麻鞋白袖子長公風流今
在茲湖邊冷塔亦舉火晨齋不歸長者怒

訪雲栖師

下及半山逢遠風風聲洪洪吹寺鍾亂石盤折
無次第松籬戢疊迷西東觸景緣念增慨慷生
季三十多荒唐君不見山之塢草頭綿綿晝眠
虎白髮頭陀爾何苦

西湖竹枝詞

踏踏吳歌十二時油車白馬客參差自從風雨
西陵歇翻却楊枝唱竹枝

菱田高與稻田齊野井螻蛄徹夜啼若箇竹枝
聲最苦那兒橋北趙園西

高懸十里下風梳白袷青裙次第來怪道竹花

簪不盡五雲山上賽神回
簇簇滿炊菰米飯娟娟緩唱踏歌詞爲謝西湖
蘇太守桃芽柳眼不須吹
酒盡爐青客未休脫衣走馬恣風流西湖亦有
橫塘曲一拍風吹入秀州
請君一向斷橋行橋下花泥漸漸平此日風光
應不忘重來記取竹鷄聲

錢塘江浪淘沙

暗水漫天不見沙叢叢海燕宿蒹葭揚州估客
爭欺得打浪撈泥一任他

石脚高低白浪奔剛剛石上印沙痕夜來潮信
如風急忽地移痕到驛門

盤盤沙浪旋回渦浩蕩空江鬼夜歌由來不信
錢塘險曾向龍山渡也麼

大野荒荒風怒號上流纔急下流高花光閣外
新沙暗十五漁郎好放篙

澁澁青沙軟不流茸茸細草漫汀洲秋來幾度
江籬濕催得行人白到頭

白馬神君踏水煙魚牙鼉鼓拍風鮮無端子午
江如市日日淘沙漾紙錢

聞道山陰雪半消北連湖水下桐橋桃花浪起
衝沙破恰好東風上白鱗

惆悵行人不遽來風風雨雨過黃梅門前唱罷
箜篌引潮落沙低又一回

乙酉春余與仲醇讀書支硎山日凡三出
隨目所得卽誦於口效天如和尚體詩在
歌偈之間不必盡解無論工也

曉山烟重暮山開石馬三朝半綠苔掃得墓門
清似水梅花昨夜又飛來

十畝山田任客租松毛滿澗半荒蕪偶然昨夜
風和雨綠到僧家香積廚

清明將近陌頭黃稻種參差打麥場無賴煖風
催插種趁閑日日上松岡

白白黃黃卷耳根采來其柰北山昏經過市上
無烟火人在溪橋洗藥盆

原上春風散鬼燐馬蹄月上暮山貧樵哥猶自

不歸去放鶴亭中問主人
天平酒客欲歸時路口人家正晚炊墻上新生
青竹子亂敲花板落秧池
夜來月暈半無光今日風頭不可當我勸游人
且歸去百花如雨下山塘

哀寒食

野田麥飯攤陸續甚風疾雨泥相蹴黃雀何所
將兒啄啾啾飛上人家屋屋上多季生瓦松五
月不掃花蓬蓬新起高臺缺墻壁兩廊黑暗啼
陰蟲自來臘月斷煙火何日不同寒食苦耳房
冷氣旋作風那更餘灰施空土人生誰能百歲
期井中之影霜後枝君不見東家兒孫聚頭哭
紙錢不動收魂旗

游玄墓

出郭薄遊覽鷄豚初散時老農能驗歲小女學
繰絲茶地開新徑松陰在短絺豈須尋遠興在
在野情宜

游虎三橋橋東西已半爲淺洲平田非復

昨水月之觀矣

宿昔當橋門舟師戒犯浪邇來太湖灘蘆花白
蕩蕩

我觀滄桑變天地無倚托無令後人笑經營好
石榔

別支硎山一年舊遊如夢記憶未遣戲拈

短句

根在原上花在水邊悅懌女美而不能言
將子上山驕不能下好風來吹衣裳欲化

野日玄黃歸無迺早剩有酒漿以漬宿草
薄來無日酒場載遷于以流連于彼墓田
扶者醉者其行施施下防石芽上瓜藤刺
旅旅酒亭落落水亭紅衣者客白衣者僧
有蟻出遊封于高壘明日大難愁而不寐
榆葉始秀色如老鴉有情無情綴以紅花
我夜讀書有聲過耳流星如燿照見野鬼
菜花茸茸鶯花間之我醉匪酒酒慵不支
春日洵美其光洋洋野馬如霧亂人心腸

風吹嘯歌不見倫理松聲鳥聲亦下亦起
長杉老栢于焉盤桓陳郎去矣影在樹間
支公所遺不毛者石風過石青雨過石黑
步出東門其樂綏綏舉頭見花誰不能思

思仲醇也

春仲園居

無事此經月細草衣垣墻開門不見人但聞花
甌香眷言對華滋有懷托春陽無棄管蒯質生
理各有當

夏日園居

不到已經月園門夏雨初檉花來喜鵲蘆筍散
新魚宛宛扇無力紛紛月自踈如聞桔槔動夜
起讀耕書

淨掃竹亭子深居聊自娛旅葵當淺戶乳燕入
新廚小睡幸無客閒行多起予因知野中興定
與市朝殊

瓜已東門熟東臯禾尚蕪有田耕自耦不酒醉
為徒客苧先霜白蟬聲共暑徂薄登山果賦魚
鳥任成逋

續山先生集 卷之一
三
隨意尋春到欣欣藥徑蘇蒺藜從得刺蕙苾任
爲珠百鳥充花使千頭仗木奴灌園如可老吾
欲傲江湖

傷士不遇

士爲四民首豈以示夸異末俗雅道傷浸浸逐
聲勢顏色貴姣好衣服別鮮麗隸也夫何力宴
笑樂泄泄念彼非殊絕文辭善粧綴父老有好
言摘事曲相說重違人不祥俛心受經藝

昔爲糝中實今爲倉上塵隨風任簸揚積粟如
積薪嗟我同舍子短鬚未覆唇竭歸父母喜車
馬耀四隣縣伯不追呼鍾鼓邀上賓十五學句
讀名姓固沈淪試察丘里言讚歎聲何頻

少季盛意氣縱橫矯無上不學諒可能韓生志
何壯束髮受衡軛鼻息制俯仰氣數專事權遭
際忤謀望豈其乏良圖致身竟無狀跛兒牧群
羊羣羊不能抗

三反省過愆過愆不可得出門欲訴人逡巡慘
顏色嬉怒相對持聽者反不直談笑聊支吾反

續山先生集 卷之一
覆誰黑白婦口執嫵妬人情險於蛾去去勿復
道掩卷空抑扼天也非不良勢實不爾克

賢士良自苦貧賤難爲工事親貴名揚鄉黨羞
固窮余慕孝廉節雅志亦載攻孟浪越少壯始
事鮮有終名實難兼專虛生負皇穹誓將棄此
道礪此言行庸祇恐命有制人道或不容

苑枯如可測造化焉用之始知日月光周流亦
遷移人情任營度如彼奕者棊晏嬰爲之宰曾
不容仲尼願君絕尤怨鎡基貴乘時本無糾墨

質杙椽其安施

慷慨抱獨是我舌亦旣毀喻張順衆譽矯物昧
人理鬱陶徒苦傷廓落謂無恥顧我何百難獨
以有名耳人生如日徂見在而已矣牛馬可迭
爲名字更自美能以退爲進雖敗亦可喜

讀陳白沙先生詩

道味淡亦盡詩才消未窮能將堯夫質巧托少
陵工寂寞自成響悠揚如在空世無先輩在高
韻與誰同

會意律如動深心言入微盈盈眼前景瑟瑟箭
鋒機造化能隨手風光不墮圍太玄真尚白人
道解嘲非

懷陳仲醇

舉世厭人倫師道久滅裂里塾與序庠句讀鄙
是屑稱餼薄未效擊蒙笑爲拙童子驕佩觸居
就先生列陳郎古人心喟然伏竒節身植洙泗
刑彌縫黨所闕羨君志良苦思君未敢說
聞道愧殊暮年駛將柰何所見或恍惚石火光

已過譬彼蕉子心葉葉如重簑伐木乃見本豈
不在執柯微賢雖如風足可做蹉跎相違僅三
月遂與俗事和安得叔度來破我鄙吝多
著屐巡池塘濯濯花與柳鳥鳴挾雨韻苔生覆
魚雷舉目動成思思之不可有平生縱慵拙雅
不解藏醜我非易牙味聊可悅我友吾友不復
來獨賞得佳不同病諒亦然珍重且勿苟

自嘆

前身是居士生長宰官家飲啄齋時飯心情春

後花強教應賓客差亦勝紛華終自慚予拙城
門學種瓜

自我不如意讀書知半訛摘花聊調笑焚草避
譏訶棄世終難說遭時似小過生涯如恨恨詹
尹道如何

少有嵇公癖那堪與世親裳衣或顛倒車馬太
逡巡避客私開徑移園更卜隣非關愛沉寂我
是自由人

束髮事經藝心將文在茲窮愁復誰信公是久
予欺風雨拋書夜衣冠動古思吾猶及大雅不
謂遂如斯

崑崙山人焦螟寄歌

崑崙王山人有舌如流泉文章傾注不得盡酒
醉微吟秋水篇心中豁然了無事厭薄江湖等
朝市妻子饕餐那得知五十閑身謀所寄寄身
不及春鳥窠粗排竹木復補蘿淺窻矮戶安不
頗熹微恰愛晨光多午眠卯飲恣婆娑稱意呼
爲安樂窩汲汲波波自今古岡頭草色如雜組

紅山先生集 卷之一
吁嗟我不如焦螟蚊睫之上無風雨何物么麼
字丈夫山人山人殆隱乎

雙白燕歌敬爲二叔頌萬福

氤氳屋梁煖氣生瑤光散落天河清光芒不肯
太狼籍東到大海初分明玄鳥遂將雙白玉赤
睛黃口驕相逐滿地霰花如洗粧更添晴月來
新沐差池素羽風娟娟改服不受諸雛憐烏衣
已故海泥薄移巢近向君堂前堂前一片荆樹
紫氍裘主人色相似錦簇銀綾覆玉筐輝輝對
舞春從始行見致君葵葉芝千秋萬歲頌公尸
滿堂賓客賦欲就正是梁園初雪時

贈趙凡夫

靜者意常餘幽齋事事如衣冠耕墓草婦子饌
山蔬桐樹成棲並蓮花結社初買隣真不惡轉
欲愛吾廬

漸老白雲根依微見水痕石如聽說法鶴已解
應門日冷青松谷風開芳草樊徑蒿時不剪綦
縞亦能言

新山先生集 卷之一
雨後游天池

嶂影周遭合池光宛自通壁飛千道雨谷受四
山風引水香厨裏分泉靜鉢中蓮花青可摘望
望色成空

送長孺北征

何以別君無苦顏男兒兩足多波瀾况復春水
平登百千尺吕梁石爛黃河寬今日橋頭設小
俎郵筒正報潮來午天絲飛飛撲酒壺君船且
逗荷花浦浦花不可見船去疾于箭三月蠶子

眠青桑思君此際過高唐俄然大道棗園熟馬
頭已飽長安粟長安瓜李玉不如內家冰氣頗
有餘莫道黃沙暗額角早涼會見秋風除秋風
發發送吾子不負當時舊弧矢老大無端怯暑
寒千里之行自此始我唱吳歌軟且輕爲君擊
筑歌燕聲燕聲吹入北山去落月亭亭挂楓樹

籬蕘園觀落梅

辛苦愁中見偷將酒量開何郎大遷次還逐好
風來甲散春無力花香子漸催苦爲看不足後

日且啣杯

送王岡伯北上

祖帳西門道君行去徐徐雪月凌淮河肅風戒
征車瓦上冰乳鳴循床顧衣裯中夜暖粟酒倉
皇意踟躕黃沙菴昏星出門昧所如丈夫薄溫
飽無爲歎勤渠

買粟不問主買馬不問價燕市有殊價黃金古
臺下一朝遭知遇聲名美狼藉太常薦鹵簿官
厨上羞炙更衣篋有餘賓門客無暇銅龍上新
詞秘書自中借光艷榮一鄉何乃况同舍

直直簷下松不能抗廊廡雖以有力者不能越
垣堵得志何不爲稷契奚足數皎皎聖賢心無
使落草莽濯纓清水源種桑擇高土京塵慎素
緇志士良自苦

送張汝增北上應試

明星肅肅曉裝齊容易關頭信馬蹄柳白淮河
遮大道鷄鳴野店薦新稊老親輟洗迎歸客博
士持經問杖藜何況長安最佳麗秋風花鼓大

街西

送沈際甫復任龍溪

賢令未解郡渡頭人吏囂絃歌漸下里火種正
東臯門外致牛酒群中惜羽毛借君應有意莫
厭簿書勞

贈朱虞封

練之民比屋何蕭然市門白日鳴弓弦問誰致
此未敢言繼活我者朱侯賢朱侯骯髒清玄
不惜曲意審治便節縮身已爲吏先壺漿尚恐

傷民錢煦濡仁義折笞鞭輕擿官俸任免蠲行
之邑里歌且絃逃丁有屋墟生烟訟庭閑寂慈
烏眠開鋤隴畝麻麥連人人道是朱公田更欲
借君三兩季循良譽望不可延縣門慟哭攀車
韉吾願慰汝以好言君今洽禮人天歡能時旱
潦貽民安况汝父母恩所偏但逢豐熟念長官
乞花塲詩爲徐孟孺陳仲醇作

兩郎租山山背虛野鶴有巢花有廬石芽磔翠
舖庭除勾連湖水通花渠春來紅白娟娟笑山

頭明月來相照乍可新香釀酒醪剩將狼藉供
才調風風雨雨無不宜高高下下惟所施濕雲
滿天土膏滑乞花幸及黃梅時非但與山添景
色兼爲古人留勝跡花神自合來周旋生長不
賴花奴力

乞花塲雜詩

二陸祠

白雲頽不流山堂久蕪沒乍聞百花香風流如
可撥

斑竹堂

新竹點點黃疑是花上露空堂烟橫生不見人
來處

楊柳橋

春動板橋上携邛我獨行悠悠山渡好楊柳任
縱橫

蝌蚪灣

落花知幾多清流着春膩菱葉如許長草蛙生
子未

續山先生集 卷之一
三
頽石壑

湖上赤霞氣倒射石壁光披髮視天井居然在
扶桑

紅菱渡

秋嘗憇未舉秋水正潔清紅菱如可採羞作紫
萼羹

澆花井

就近穿山井灌園聊自怡潮潮春水上好弄結
棹兒

洗鶴涇

青溪蘿月靜抱鶴理毛衣悠然放鶴去恰帶水
花飛

蕉室

我愛蕉子葉好風亦好雨夜靜聽不厭燈花欲
語語

與長孺泛舟園池觀雨後月

娛人有良夜媚月淡雲浮露氣深棲樹霜華滿
到樓吹簫向風口載酒在花溝無窮愛今夕更

與助清幽

園中詩

雖復勤夷草心常願草滋更愁生路狹撲到石
墩兒

老農未容易老圃亦殊難開渠來放水旋復怕
花乾

春將三月短景物暫湏賒獨立斜陽下閑拈郁
李花

草花未生子蒲芽如半開撐船就灘上自在放
魚來

人道園翁拙園翁興益奢種樹無頭次行行雜
見花

不禁看花雨粗安屋兩椽老親容膝外長共雀
雛眠

會有魚兒散先期下水松順時行月令長物與
春同

位置蜂筒穩清明穀雨大憐他作蜜苦移就草
花邊

未解調禽性先來課竹兒鄰家竹許大養在笋
尖時

送王將軍督運

日光曛曛海波偃戰鼓無皮大旗捲金吾將軍
氣如雲亦向船頭督輪輓石梁冰澌雪未央黃
河沙凍天蒼蒼男兒橫行不裹糧千艘萬艦如
風翔况聞北庭淨羣醜馬鞭縱橫壯夫走今朝
鵠印落君手歸來莫忘發跡初歸瀝淮陰一杯
酒

唐道徵作狀頭漫寄

生平苦作違心事拙于用長與時會公卿白眼
輕文章里中小兒識科第自甘懶廢年復年耳
中猶願聞人賢况我故人貧且好富貴不欲居
君先君今磊落空群才白馬蹀躞黃金臺內家
衣袍清且裁榮名如此良可懷丈夫容易致身
子上報吾君下知己既有出者可以處嚴瀨之
間吾足矣

孟夏與長孺輩泛舟迴瀾臺

荒荒落日照孤墩就可中央立衣門草木半江
屯雨氣波瀾平地出山根春秋弔古餘尸祝我
輩臨流次酒樽躑躅暮雲感慨在更將遺恨問
平原

初秋月夜園外散步

陰陰竹徑中隱隱通繩橋橋上竹籬從橋下星
動搖獨往平疇間白露沾稻苗介然亦何之遠
望高樹標

月白鵲投樹夜涼人在門我行亦造次未敢通
問言小兒倚桔槔但指明星繁白龍昨蟪蛄膏
雨當何村

微風拍秋螢欸欸飛欲高時來觸團扇近人光
自韜豈無燈燭張憐汝飛蛾遭羣動亦有息農
務緩所操絡緯索索啼織婦行已勞

我田占城稻七月先登場橋西歷歷黃半頃收
夕陽東疇剛放花露氣浮甘香力入雖云薄幸
免秋雨荒早晚粳酒熟隣父歡來嘗

獨坐梧桐下紛然落殘果低頭浣葛巾不覺蘚

冠墜汎瀾流月光掬之復在左忽驚人影翻不知
知乃是我

菖蒲石

秋月影拳石知復幾許丈不盡菖蒲青油油疊
春浪

芝石

燁燁五色芝生于千仞岡紫霞澹離披采之不
盈筐

螢

溽暑蟲蟲怨孤螢獨自閒飛星流碧漢一點破
青山照影杯前落衝人扇底還東風那不度百
草露斑斑

五舅游燕坐分牙帳歌以送之歸

生不願執耕課桑田間醉亦不願伊吾徬徨老
食蠹魚棄男兒墮地走如風赤手能博雲臺字
咄嗟吾舅雄姿標龐眉睥目虬髯飄挾彈戲走
長安道捉鼻富貴來招邀匝匝金飾青驄鑣模
糊錦簇雕弓稍弓今歸殺馬歸園時清送君且

歸去如聞廟策安思危坐致金吾問前著頭顱
未老建隼旗任汝猛氣吞居胥誰云宅相小魏
舒只今長矣猶讀書

寄答屠長卿

聞君待詔建禮門青縑紫纈香初溫俄然風雨
秋一葉犯浪歸爾桃花村盡道文章憎纓紱古
人逐貧是何物人情強分枯與苑我獨何爲自
咄咄祇應升斗水不能活莊周放之東海邊咲
傲凌滄洲陶公太白相對出金娥玉枕長江頭

妻春子耕不足問空策短劔輕于鷗擲還手板
持酒杯天地豈私貧我哉有詩百篇足歌嘯蓬
徑復向誰行開青蘿如髮幸未白藜桂徒攪幽
人懷君自美服集人指身非娥眉妬奚來長安
覆車多于太行道使我疑古黃金臺禿此三寸
穎供爾三尺喙與爾千秋名千秋復誰在我自
有友安期公拍杖招我漁溪東海門一潮夜月
白北鴈俄作東賓鴻有時相將御無極吾願爲
雲子爲龍豈能熟寐聽呵殿掩卷脉脉嗟途窮

况我與爾皆半老向子損益諒所保囊中含章
苦不早浮雲西征塵浩浩

酬王崑崙先生

鹿門車馬漸難期肯自扁舟爲我移入夜松風
窺靜榻半規蘿月照深巖竭來求仲開三徑可
許蟪蛄共一枝天下有君知已在浮雲身世莫
相疑

送李茂實北上兼簡殷無美

百尺廣陵潮十五邗溝月送子千里舟悠悠江
上發江上綠蘋霜滿頭驛亭掃葉迎星郵使星
西流客星隱今季重九茱萸愁愁緒不可及揮
手但努力人豈鹿豕哉况子婚嫁畢豈不念斗
酒一篇自抑扼委蛇未肯慙退食東海一腐儒
德衰笑鳴鳳不作長安游時作長安夢勾陳玄
武霾朝昏山鬼晝嘯青天渾十年磨劒不改試
千秋著書難具論此間五湖一片雨污萊半奪
漁樵村借君喉舌叫帝闈民茲無衿禾頭髮及
今蠲賑猶見恩輶軒使者乞恩已爲我轉致殷

無美去歲風走赤白囊壯君飲酒不衰止君能
辦虜虜易與如聞海上復塵起餘皇散盡組練
荒樓船將軍以誰使吾已好言謝鄉里耕桑無
恙有吾子

問伯浮香閣觀梅

巡簷索笑亦難逢况復憑高千萬叢冷葉粘罇
吹不散踈花入眼照還空池光黯澹搖晴雪山
影低昂護晚風彷彿美人來月下闌干斜出一
枝紅

栩栩園詩

結廬在川上川流自成折萬里船可呼千章木
如結闢宇迴高風疏池湛秋潔門外平湖光灑
灑若可掇烟波澹人意魚鳥媚吾拙芳草忽冒
堤翕翕春夢熱物華洵駘蕩旣寤亦同悅

南園雜花明竹淨香微微開簾散芳旭蝴蝶紛
滿衣栩栩各有適夢覺誰是非袞繡東來時駟
馬滿路輝湖山落廳事朝夕變景暉井深寒泉
食澤廣潮田肥風流緬前哲因之寄音徽頽仰

絳山先生集 卷之
園林好未與檠戟違遽然公案旁吾意欣有歸
家園白蓮花中錯殷紅數瓣

芙蓉幕裏一枝芳宮彩紛披白玉堂借得紅酣
剛半面褪來朱粉剩殘粧銀河月照天孫錦華
渚虹飛素女裳知是寸心含不盡秋風故合兩
花香

題內官出家像

惆悵東風十二闌錦鞍玉勒幾回閒自從龍象
傳經後白馬歸來識故山

自來奉御玉皇前磨袖何從得晏眠久厭諸天
饒色相布毛吹徹半生緣

日日焚香玉案臨隨緣瓢鉢主恩深人來欲問
宮中事忍草窓前知我心

故識當年供奉人寫來生面侶前身到頭錐立
元無地幾樹梅花未是貧

壽從叔

九十春光未老時當堦紅藥照深卮賓筵杖屨
扶黃髮吾黨衣冠讓白眉堂上德星看映彩簾

續山先生集 卷之一
前滿月正如規竹林小院歸來後日日相將醉
接籬

壽封君

仙郎里舍整從容通德先生始杖筇漢史新成
循吏傳秦官未老大夫封帳前桃徑看初合郭
外棠陰望已重最喜白雲秋署氣江湖日日信
音逢

題二色牡丹

宮雲朶朶映朝霞百寶欄前鬪麗華卯酒未消
紅玉面薄施檀粉伴梅

洛陽女兒紅顏饒血色羅裙寶袜腰借得霓裳
半庭月居然管領百花朝

曹子念賦緱山行贈別率爾奉酬

王郎來而不見而兄厭臭腐蒼龍白鳳森翱翔
又不見而翁抗疏辭魏闕袞衣苦戀慈親旁爾
何短裘鈍馬走冰雪萬目睽睽心短長懊昔人
言苦不早奚囊蠹魚且半老浮丘笙鶴不自保
萬事人間摠草草姓名已挂世人口能復行藏

緱山先生集 卷之一
落人手無心要看長安花與客但醉邯鄲酒酒
中白眼看是非爲蛇爲龍我何有吾不媿他人
乃媿曹先生先生陳思後雲綺紛縱橫舅氏青
箱顧向誰天下詞壇執牛耳近忽避人草太玄
松窓竹扉朝不啟自言我老百不緣獨有憐才
心未死贈我瓊瑤枝投我琅玕篇高賢豈必後
生畏品題欲死居人先何以報所知指此寸心
是蹉跎筆花夢好醜反覆似抱牘不卽棄以此
負君矣君歌緱山且柰何山中之人已如此

初日照積雪

暖暖墟烟薄輝輝日氣晶白雲虛點染積雪淡
微明樹結層冰綵山含凍雨情驅車原上好鳥
鳥樂新晴

緱山先生集卷之一

新編先生集

卷之一

三

